

四庫全書

子部

欽定四庫全書

冊府元龜卷一百八十七 宋 王欽若等 撰

閏位部

勲業第五

梁太祖神武元聖孝皇帝宋州碭山縣人也未冠而孤
母王氏携養寄於蕭縣人劉宗之家帝既壯以雄勇自
負唐僖宗乾符中關東薦饑羣賊嘯聚黃巢因之起於
曹濮饑民願附者凡數萬帝乃辭宗家與仲兄存俱入

巢軍以力戰屢捷得補為隊長唐廣明元年十二月甲申黃巢陷長安遣帝領兵屯於東渭橋是時夏州節度使諸葛爽率所部屯于櫟陽巢命帝招諭爽爽遂降於巢中和二年二月巢以帝為東南面行營先鋒使令攻南陽下之六月帝歸長安巢親勞於灞上七月巢遣帝西拒邠岐鄜夏之師於興平所至皆立功二年二月巢以帝為同州防禦使使自攻取帝乃自丹州南行以擊左馮拔之遂據其郡時河中節度使王重榮屯兵數萬

糾合諸侯以圖興復帝時與之鄰封屢為重榮所敗遂請濟師於巢表章十上為偽軍使孟楷所蔽不達又聞巢軍勢蹙諸校離心帝知其必敗九月帝遂與左右定計斬偽監軍使嚴貴舉郡降於重榮重榮即日飛章上奏時僖宗在蜀覽表而喜曰是天賜予也乃詔授帝左金吾衛大將軍充河中行營副招討使仍賜名全忠自是帥所部與河中兵士偕行所向無不克捷三年三月僖宗制授帝宣武軍節度使依前充河中行營副招討

使仍令候收復京闕即得赴鎮四月巢軍自藍關南走
帝與諸侯之帥俱收長安乃率部下一旅之衆仗節東
下七月丁卯入於梁苑是時帝年二十有二時蔡州刺
史秦宗權與黃巢餘孽合從肆虐共圍陳州久之僖宗
乃命帝為東北面都招討使時汴宋連年阻饑公私俱
困帑廩皆虛外為大敵所攻內則驕軍難制交鋒接戰
日甚一日人皆危之惟帝銳氣益振是歲十二月帝領
兵於鹿邑與巢衆相遇縱兵擊之斬首二千餘級乃引

兵入亳州因是兼有譙郡之地四年春帝與許州田從
異下諸軍同收瓦子寨殺賊數萬衆是時陳州四面賊
寨相望驅虜編氓殺以充食號為春磨寨帝分兵翦撲
大小凡四十戰四月丁巳收西華寨賊將黃鄴單騎奔
陳帝乘勝追之鼓噪而進會黃巢遁去遂入陳州刺史
趙犍迎於馬前俄聞巢黨尚在陳北故陽壘帝遂逕歸
大梁是時河東節度使李克用奉僖宗詔統騎軍數千
同謀破賊與帝合勢於中牟北邀擊之賊衆大敗於王

蒲渡多束手來降時賊將霍存葛從周張歸厚張歸霸皆匍匐於馬前悉宥而納之遂逐殘寇東至於宛句五月甲戌帝與晉軍振旅歸汴館克用於上源驛既而備犒宴之禮克用乘醉任氣帝不平之是夜命甲士圍而攻之會大雨雷電克用因得於電光中踰垣遁去惟殺其部下數百人而已六月陳人感解圍之惠為帝建生祠堂於其郡是歲黃巢雖沒而蔡州秦宗權繼為巨孽有衆數萬攻陷鄰郡殺掠吏民屠害之酷更甚巢賊帝

患之七月遂與陳人共攻蔡賊於澱水殺數千人九月
己未僖宗就加帝檢校司徒同平章事封沛郡侯食邑
千戶光啓元年春蔡賊掠亳潁二郡帝帥師以救之遂
東至於焦夷敗賊衆數千生擒賊將殷鐵林梟首以徇
于軍而還三月僖宗自蜀還長安改元光啓四月戊辰
就加帝檢校太保增食邑千五百戶十二月河中太原
之師逼長安觀軍容使田令孜奉僖宗出幸鳳翔二年
春蔡賊益熾時唐室微弱諸道州兵不為王室所用故

宗權得以縱毒連陷汝洛懷孟唐鄧許鄭園幅數千里
殆絕人煙惟宋毫滑潁僅能閉壘而已帝累出兵與之
交戰然或勝或負人甚危之三月庚辰僖宗降制就封
帝為沛郡王是月僖宗移幸興元五月嗣襄王溫僭即
帝位於長安改元為建貞遣使齎偽詔至汴帝命焚之
于庭未幾襄王果敗七月蔡人逼司州節度使鹿宴弘
使來求救帝遣葛從周等率師赴援師未至而城陷宴
弘為蔡賊所害十一月滑州節度使安師儒以怠於軍

政為部下所殺帝聞之乃遣朱珍李唐實襲而取之由是遂有滑臺之地十二月僖宗降制就加帝檢校太傅改封吳興郡王食邑三千戶是歲鄭州為蔡賊所陷刺史李璠單騎來奔帝宥而納之以為行軍司馬宗權既得鄭益驕帝遣裨將邏於金隄驛與賊相遇因擊之賊衆大敗追至武陽橋斬首千餘級帝每與蔡人戰於四郊既以少擊衆常出奇以制之但患師少未快其旨宗權又以已衆十倍於帝恥於頻敗乃誓衆堅決以攻夷

門既而獲蔡之謀者備知其事遂謀濟師焉三年春二月乙巳承制以朱珍為淄州刺史俾募兵於東道且慮蔡人暴其麥苗期以夏首回歸珍既至淄隸旬日之內應募者萬餘人又潛襲青州獲馬千匹鎧甲稱是乃鼓行而歸四月辛亥達於夷門帝喜曰吾事濟矣是時賊將張暉屯於北郊秦賢屯於版橋各有衆數萬樹柵相連二十餘里其勢甚盛帝謂諸將曰此賊方今息師蓄銳俟其時必來攻我况宗權度吾兵少又未知珍來謂

吾畏懼止於堅守而已今出不意不如先擊之乃親引
兵攻秦賢寨將士踴躍爭先賊果不備連拔四寨斬首
萬餘級時賊衆以為神助庚午賊將盧塘領萬餘人於
圃田北萬勝戍夾汴水為營跨河為梁以扼運路帝擇
精銳以襲之是日昏霧四合兵及賊壘方覺遂突入掩
殺赴水死者甚衆盧塘自投于河河南諸賊連敗不敢
復駐皆併在張睜寨自是蔡寇皆懷震讐往往軍中自
相驚亂帝旋師休息大行犒賞繇是軍士各懷憤激每

遇敵無不奮勇五月丙子出酸棗門自卯至未短兵相接賊衆大敗追斬二十餘里僵仆相枕宗權恥敗益縱其虐乃自鄭州親領突將數人徑入張旺寨其日晚大星殞於賊壘有聲如雷辛巳兗鄆滑軍士皆來赴援乃陳兵於汴水之上旌旗器甲甚盛蔡人望之不敢出寨翼日分布諸軍齊攻賊寨自寅至申斬首二萬餘級會夜收軍獲牛馬輜重生口器甲不可勝計是夜宗權旺遁去遲明追之至陽武橋而還宗權至鄭州乃盡焚其

廬舍屠其郡人而去始蔡人分兵寇陝維孟懷許汝皆先據之因是敗也賊衆恐懼咸棄之而遁帝乃慎選將佐俾完緝壁壘為戰守之備於是遠近流亡復歸者衆矣是時揚州節度使高駢為裨將畢師鐸所害復有孫儒楊行密互相攻伐朝廷不能制乃就加帝檢校太尉兼領淮南節度使九月亳州裨將謝殷逐刺史宋衮自據其郡帝親領軍屯於太清宮遣霍存討平之帝之禦蔡寇也鄆州朱宣兖州朱瑾皆領兵來援及宗權既敗

帝以宣瑾宗人也又有力於已皆厚禮以歸之宣瑾以
帝軍士勇悍私心愛之乃密於曹濮界上縣金帛以誘
之帝軍利其貨而赴者甚衆帝乃移檄以讓之自朱宣
來詞不遜乃命朱珍侵曹伐濮以懲其姦未幾珍伐曹
州執刺史丘禮以獻遂移兵圍濮充鄆之釁自茲而始
矣十月僖宗命水部郎中王贊撰紀功碑以賜帝是月
帝親騎數千巡師於濮上因破朱瑄援軍於范縣丁未
攻陷濮州刺史朱裕單騎奔鄆尋為鄆人所敗踰月乃

還十二月僖宗遣使賜帝鐵券又命翰林承旨劉崇望
撰德政碑以賜帝閏月甲寅帝請行軍司馬李璠權知
淮南留後乃遣大將郭言領兵援送以赴揚州文德元
年正月帝率師東赴淮海行次宋州聞楊行密已拔揚
州遂還是時李璠郭言行至淮上為徐戎所扼不克進
而還帝怒遂謀伐徐二月丙戌僖宗制以帝為蔡州四
面行營都統繇是諸鎮之師皆受帝之制度三月庚子
昭宗即位是月蔡人石璠領萬眾以剽陳毫帝遣朱珍

率精騎數千擒璠以獻四月戊辰魏博樂彥禎失律其子從訓出奔相州使來乞師帝遣朱珍領上軍濟河連收黎陽臨河二邑既而魏軍推小校羅弘信為帥弘信既立遣使送款於汴帝優而納之遂命班師是月河南尹張全義襲李罕之於河陽克之罕之單騎出奔因乞師於太原李克用為發萬騎以援之罕之遂收其餘衆與晉軍合勢急攻河陽全義危急遣使求救於汴帝遣丁會牛存節葛從周領兵赴之大戰於溫縣晉人與罕

之俱敗於是河橋解圍全義歸於河陽因以丁會為河陽留後五月己亥昭宗制以帝檢校侍中增食邑三千戶戊辰詔改帝鄉曰衣錦鄉里曰沛王里是月帝以兼有洛孟之地無西顧之患將大整師徒畢力誅蔡會蔡人趙德諱舉漢南之地以歸於朝廷且遣使送款於帝仍誓戮力同討宗權帝表其事朝廷因以德諱為蔡州四面副都統又以河陽保義義昌三節度為帝行軍司馬兼糧料應接使至是帝領諸侯之師會德諱以伐蔡

敗蔡賊於汝水之上遂傳其城五日之內樹二十八寨以環之蓋象列宿之數也時帝親臨矢石一日飛矢中其左腋血漬單衣顧謂左右曰勿洩九月以糧運不繼遂班師是時帝知宗權殘孽不足為患遂移兵以伐徐十月先遣朱珍領兵與時溥戰於吳康鎮徐人大敗連收豐蕭二邑溥携散騎馳入彭門帝命分兵以攻宿州刺史張友携符印以降既而徐人閉壁堅守遂命龐師古屯兵守之而還是月蔡賊孫儒攻陷揚州自稱淮南

節度使龍紀元年正月龐師古攻下宿遷縣進軍於呂
梁時溥領軍二萬晨壓師古之軍而陣師古促戰敗之
斬首二千餘級溥復入於彭門二月蔡將申叢遣使來
告縛秦宗權於帳下折其足而囚之矣帝即日承制以
叢為淮西留後未幾叢復為都將郭璠所殺是月璠執
宗權來獻帝遣行軍司馬李璠牙校朱克讓檻進於長
安既至昭宗御延喜樓受俘即斬宗權於獨柳樹下蔡
州平昭宗詔加帝食實封一百戶賜莊宅各一區三月

又加帝檢校太尉兼中書令進封東平王賞平蔡之功也
大順元年四月丙辰宿州小將張筠逐刺史張紹光擁衆以朋時溥帝率親軍討之殺千餘人筠遂堅守乙卯時溥出兵暴碭山縣帝遣朱友裕以兵襲之敗徐軍三千餘衆獲沙陀援軍石君和等三十人斬於宿州城下
六月辛酉淮南孫儒遣使修好於帝帝表其事請以淮南節度授于儒焉辛未昭宗命帝為宣義軍節度使充河東東面行營招討使時朝廷宰臣張濬將兵討太

原故也八月甲寅昭義都將馮霸殺沙陲所署節度使
李克恭來降帝請河陽節度使朱崇節為潞州留後戊
辰李克用自率蕃漢步騎數萬以圍潞州帝遣葛從周
率驍勇之士夜中啣枚犯圍而入於潞九月壬寅帝至
河陽遣都將李讜引軍趨渾潞行至馬牢川為晉人所
敗帝又遣朱友裕張全義率精兵至渾州北以為應援
既而崇節從周棄潞來歸戊申帝廷責諸將敗軍之罪
斬李讜李重裔以徇遂班師焉十月乙酉帝自河陽赴

滑臺時奉詔將討太原先遣使假道于魏魏人不從先是帝遣行人雷鄴告糴于魏既而為牙軍所殺羅弘信懼故不敢從命遂通好於太原十二月辛丑帝遣丁會葛從周率衆渡河取黎陽臨河又令龐師古霍存下淇門衛縣帝徐以大軍繼其後二年春正月魏軍屯於內黃丙辰帝與之接戰自內黃至永定橋魏軍五敗斬首萬餘級羅弘信懼遣使持厚幣請和帝命止其焚掠而歸其俘弘信繇是感悅而聽命焉乃收軍屯於河上八

月己丑帝遣丁會急攻宿州刺史張筠堅守其壁會乃率衆於州東築堰壅汴水以浸其城十月壬午筠遂降宿州平十一月丁未曹州裨將郭紹賓殺刺史郭饒舉郡來降是月徐將劉知俊率衆二千來降自是徐軍不振十二月兗州朱瑾領軍三萬寇單父帝遣丁會領大軍襲之敗於金鄉界殺二萬餘衆瑾單馬遁去景福元年正月遣丁會於兗州界徙其民數千戶於許州二月戊寅帝親征鄆先遣朱友裕屯軍於斗門甲申次衛南

有飛鳥止於峻堞之上鳴噪甚厲副使李璠曰將有不如意之事是夜鄆州朱瑄率步騎萬人襲朱友裕於斗門友裕拔軍南去乙酉帝晨救斗門不知友裕之退前至斗門者皆為鄆人所殺帝追襲鄆至瓠河不及遂領兵於村落間時朱宣尚在濮州丁亥遇朱宣率兵將歸於鄆遂來衝擊帝策馬南馳為賊所追甚急前有浚溝躍馬而過張歸厚援稍力戰於其後乃免時李璠與都將數人皆為鄆軍所殺五月丙午遣朱克讓率衆暴突

鄆之麥十一月遣朱友裕率兵攻濮州下之擒刺史邵
儒以獻濮州平遂命移軍伐徐州二年八月帝遣龐師
古移兵攻兗駐於曲阜與朱瑾屢戰皆敗之十二月師
古遣先鋒葛從周引軍以攻齊州刺史朱威告急于兗
鄆既而朱宣以援兵至遂固其壘乾寧元年二月帝親
領大軍繇鄆州東路北次於魚山朱宣覘知即以兵徑
至且圖速戰帝整軍出寨時宣瑾已陣於前須臾東南
風大起帝軍旌旗失次甚懼失色帝即令騎士揚鞭呼

嘯俄而西北風驟發時兩軍皆在草莽中帝因令縱火而煙燄亘天乘勢以攻賊陣宣瑾大敗殺萬餘人餘衆擁入清河因築京觀於魚山之下駐軍數日而還二年正月癸亥遣朱友恭帥師復伐兗遂暫而圍之未幾朱宣自鄆率步騎援糧欲入于兗友恭設伏以敗之盡奪其餉於高吳因擒蕃將安福順安福慶二月己酉帝領親軍屯於單父以為友恭之援四月濠壽二州復為楊行密所陷是時太原遣將朱嚴兒李承嗣以萬騎馳入

於鄆朱友恭遂歸於汴八月帝領親軍伐鄆至大仇遣
前軍挑戰設伏於梁山以待之既而獲蕃將史完府奪
馬數百匹朱宣脫身遁去復入於鄆十月帝駐軍於鄆
齊州刺史朱瓊遣使請降瓊即瑾之從父兄也帝因移
軍至兗瓊果來降未幾瓊為朱瑾所紿掠而殺之帝即
以其弟玘為齊州防禦使十一月朱宣復遣將賀環柳
存及蕃將何懷寶等萬餘人以襲曹州庶解兗州之圍
也帝知之自兗領軍策馬先路至鉅野南追而敗之殺

戮將盡生擒賀環柳存何懷寶及賊黨三千餘人是日
申時狂風暴起塵沙沸湧帝曰此乃殺人未足耳遂下
令盡殺所獲囚俘風亦止焉翼日繫賀環等以示于兖
帝素知環名乃釋之惟斬何懷寶於兖城之下乃班師
十二月葛從周領兵復伐兖既至與朱瑾戰於壘下殺
千餘衆擒其將孫漢筠已下二十人遂旋師三年正月
河東李克用既破邠州欲謀爭霸乃遣蕃將張活落以
萬騎寨於河北之莘縣聲言欲救兖鄆魏博節度使羅

弘信患之使來求援四月辛酉河東泛漲將壞滑城帝
令決隄岸以分其勢為二河夾滑城而東為害滋甚是
月帝遣許州刺史朱友恭領兵萬人渡淮以便宜從事
時洪鄂二州累遣使求援故有是行五月命葛從周統
軍屯于洹水以備蕃軍六月李克用帥蕃漢諸軍營于
斥丘遣其男落落將鐵林小兒三千騎薄於洹水從周
與戰大敗之生擒落落以獻克用悲駭請修舊好以贖
其子帝不許遂執落落送于羅弘信斬之越七日我軍

還屯陽畱以伐鄆八月復壁於洹水是時昭宗幸華州遣使就加帝檢校太師守中書令四年正月帝以洹水之師大舉伐鄆辛卯營于濟水之次龐師古令諸將撤木為橋乙未夜師古以中軍先濟聲振于鄆朱宣聞之棄壁夜走葛從周逐之至中都北擒宣并其妻男以獻尋斬汴橋下鄆州平乙亥帝入於鄆以朱友裕為鄆州兵馬留後時帝聞朱瑾與朱儼兒在豐沛間搜索糧饋惟留康懷英以守兗州帝因乘勝遣葛從周以大軍襲

兗懷英聞鄆失守俄又我軍大至乃出降朱瑾朱儼兒
遂奔淮南兗海沂密等州并平乃以葛從周為兗州留
後八月陝州節度使王珙遣使來乞師是時珙弟琦實
為蒲帥迭相憤怒日尋干戈而珙兵寡故來求援帝遣
張存敬楊師厚等領兵赴陝既而與蒲人戰于猗氏大
敗之九月帝以兗鄆既平將士雄勇遂大舉南征命龐
師古以徐宿宋滑之師進趨清口葛從周以兗鄆曹濮
之衆徑赴安豐淮人遣朱瑾領兵以拒師古因決水以

浸軍遂為淮人所敗師古歿焉葛從周行及濠梁聞師古之敗亦命班師光化元年正月帝遣葛從周統諸將畧地於山東遂次于邢洺三月昭宗以帝兼領天平軍節度使餘如故四月滄州節度使盧廷彥為燕軍所攻棄城奔于魏魏人送于汴是月帝以大軍至鉅鹿屯於城下敗晉軍萬餘衆於青山口俘馬千餘匹丁卯遣從周分兵攻洺州斬刺史邢善益擒將五十餘人五月己巳邢州刺史馬師素棄城遁去辛未惠州刺史袁奉滔

自剄而死五日之內連下三州因以葛從周兼邢州昭
義軍節度留後帝遂班師是時襄州節度使趙匡凝聞帝
軍有清口之敗密附於淮夷七月帝遣氏叔琮率師伐
之未幾其泌州刺史趙璠越墉來降隨州刺史趙琳臨
陣就擒二年正月淮南楊行密舉全吳之衆精甲五萬
以伐徐州帝領大軍禦之行密聞帝親征乃收軍而退
時幽州節度使劉仁恭大舉蕃漢兵號十萬以伐魏遂
攻陷貝州州民萬餘戶無少長悉屠之進攻魏州魏人

來乞師帝遣朱友倫張存敬李思安等先屯于內黃帝
遂親征三月與燕軍戰于內黃北燕軍大敗殺二萬餘
衆奪馬二千餘匹擒都將單無敵已下七十餘人是月
葛從周自山東領其部衆馳以救魏翼日乘勝諸將張
存敬已下連破八寨遂逐燕軍北至於臨清擁其殘寇
於御河溺死者甚衆仁恭奔於滄州六月帝表丁會為
潞州節度使以李罕之疾亟故也又遣葛從周繇固鎮
路入于潞州以援丁會七月壬辰朔海陳漢賓擁所部

三千奔于淮南戊戌晉人陷澤州帝遣召葛從周於潞
留賀德倫以守之未幾德倫為晉人所逼遂棄潞而歸
繇是潞州復為晉人所有十一月陝州都將朱簡殺留
後李璠自稱留後送款于帝三年四月遣葛從周以充
鄆滑魏之師伐滄州五月庚寅攻德州拔之梟刺史傅
公和於城上己亥進攻浮陽六月燕師劉仁恭大舉來
援從周與諸將逆戰于乾寧軍老鴉隄大破之殺萬餘
衆俘其將佐馬慎交已下百餘人既而以連雨遂班師

八月河東遣李進通襲滔洺州執刺史朱紹宗帝遣葛從周自鄴縣渡漳水屯于黃龍鎮親領中軍涉洺而寨晉人懼而宵遁洺州復平九月帝以仁恭進通之入寇也皆繇鎮定為其囊橐即以葛從周為上將以伐鎮州遂攻下臨城渡滹沱以環其城帝領親軍繼至鎮帥王鎔懼納質請盟仍獻文繒二十萬以犒戎士帝許之十月晉人以帝宿兵於趙遂南下大行急攻河陽留後侯言與都將閻寶力戰固守僅而獲全十一月以張存敬

為上將自甘陵發軍北侵幽薊連拔瀛莫二郡遂移軍
以攻中山定帥王郜以精甲二萬戰于懷德亭盡殪之
郜懼奔于太原遲明大軍集于城下郜季父處直持印
鑰乞降亦以繒帛三十萬為獻帝即以處直代郜領其
鎮焉是月燕人劉守光赴援中山寨于易水之上繼為
康懷英張存敬等所敗斬獲甚衆蹂是河朔知懼皆弭
伏焉是歲唐佐軍中尉劉季述幽昭宗於東宮內立皇
子德王裕為帝仍遣其養子希度來言願以唐之神器

輸於帝時帝方在河朔聞之遽還于汴大計未決會李
振自長安使迴因言於帝曰夫豎刁伊戾之亂所以資
霸者之事也今閹豎幽辱天子王不能討無以令諸侯
帝悟因請振復使于長安與時宰潛謀反正天復元年
正月乙酉朔唐宰相崔裔潛使人以帝密旨告於侍衛
軍將孫德昭已下令誅左右中尉劉季述王仲先等即
時迎昭宗於東內御樓反正癸巳降制進封帝為梁王
酬反正之功也昭宗之廢也汴之邸吏程巖牽昭宗衣

下殿帝聞之召巖至汴折其足送于長安杖殺之是時
河中節度使王珂結援於太原帝怒遣大將張存敬率
將涉河繇含山路鼓行而進戊申攻下絳州壬子晉州
刺史張漢瑜舉郡來降帝即以大將侯言權領晉州何
綢權領絳州晉絳平己未大軍至河中存敬命繚其垣
而攻之壬戌蒲人颺素幡以請降庚午帝至河中以張
存敬權領河中軍府事河中平帝乃東遷是月李克用
遣牙將張特來聘請尋舊好帝亦遣使報命三月癸未

朔帝歸自河中是月遣大將賀德倫氏叔琮領大軍以
伐太原叔琮等自大行路入魏博都將張文恭自磁州
新口入葛從周以兗鄆之衆自土門路入洺州刺史張
歸厚以本軍自馬嶺入定州刺史以本軍自飛狐入晉
州侯言自陰地入澤州刺史李存璋棄郡奔歸太原叔
琮引軍逼潞州節度使遷乞降河東屯將李審建王周
領步軍一萬騎二千詣叔琮歸命乃進軍趨太原四月
乙卯大軍出石會關營於洞渦驛都將白奉國自井陘

入收承天軍張歸厚引兵至遼州刺史張鄂迎降氏叔
琮日與諸軍至陽城下城中雖時出精騎來戰然危蹙
至甚將謀遁矣會叔琮以芻糧不給遂班師五月癸卯
昭宗以帝兼領護國軍節度使河中尹六月庚申帝發
自大梁丁卯視事於河中七月甲寅帝東還梁邸十月
戊戌奉密詔赴長安是時朝廷既誅劉季述以韓全誨
張弘彥為兩軍中尉袁易簡周敬容為樞密使是時軍
國大政專委宰相崔胤每事裁抑宦官宦官側目崔一

日於便殿奏欲盡去之全誨等屬垣聞之嘗於昭宗前
祈哀自訴自是昭宗勅崔每有密奏令進囊封全誨等
乃訪京城美婦人十數以進使求宮中陰事昭宗不悟
崔謀漸泄中官視崔背裂以重賂其言誘藩臣以為城
社時因讌聚則相向流涕時崔掌三司貨泉全誨等教
禁兵伺崔出聚而呼譟訴以冬衣減損又於昭宗前訴
之昭宗不得已罷崔知政事崔怒急召帝請以兵入輔
故有是行戊申行次河中同州留後司馬鄴華之幕吏

也舉郡來降辛亥駐軍於渭濱華帥韓建遣使奉牋納
款又以銀三萬兩助軍是日行次零口癸丑聞長安亂
昭宗為闔官韓全誨等劫遷西幸鳳翔蓋避帝之兵鋒
也翼日遂命旋師夕次于赤水乙卯大軍集于華州下
城韓建惶駭失措即以城降丙辰帝表建權知忠武軍
事促令赴任同華二州平是時唐太子太師盧知猷等
二百六十三人列狀請帝速請迎奉己未遂帥諸軍發
自赤水壬戌次于咸陽偵者云天子昨暮至岐山旦日

宋文通扈蹕入其闈矣是時岐人遣大將符道昭領兵
萬人屯於武功以拒帝帝遣唐懷英敗之虜甲士六千
餘衆乙丑次于岐山文通遣使奉書自陳其失請帝入
覲丙辰及岐閩文通渝約閉壁不獲通復次于岐山是
時昭宗累遣使齎朱書御札賜帝遣帝收軍速還本道
帝診之曰此必文通全誨之謀也皆不奉詔癸酉飛章
奉辭且移軍北伐乙亥至邠州節度使李繼徽舉城降
繼徽因請去文通所賜李姓復本宗楊氏又請納其帑

以為質帝皆從之仍易其名曰崇本邠州平巳丑唐丞相崔喬京兆尹鄭元規至華州以速迎奉為請許之二年正月帝復次於武功岐人堅壁不下乃迴軍於河中二月聞晉軍大舉南下聲言來援鳳翔帝遣朱友寧帥師會晉州刺史氏叔琮以禦之帝以大軍繼其後三月友寧叔琮與晉軍戰于晉州之北大敗之生擒克用男廷鸞帝喜謂左右曰此岐人之所恃也今既如此岐之變不久矣四月岐人遣符道昭領大軍屯于虢縣康懷

帥驍騎敗之丁酉唐丞相崔裔自華來謁帝屢述艱運
危急事不可緩又慮羣閹擁昭宗幸蜀且告帝為之動
容崔將辭啓宴于府署帝舉酒崔情激於哀因自持樂
版聲曲以侑酒帝甚悅座中以良馬珍玩賚之既行命
諸將繕戎具五月丁巳帝復西征六月丁丑次於虢縣
癸未與岐軍大戰自辰至午殺萬餘衆擒其將校數百
人乘勝遂逼其壘七月丙午岐軍復出求戰帝軍不利
是月遣孔勅帥師取鳳隴成三州皆下之是時岐人相

率結寨於諸山以避帝軍帝分兵以討之浹旬之內並
平之九月甲戌帝以岐軍諸寨聯結稍盛因親統千騎
登高診之是時帝以岐人堅壁不戰且慮師老思欲旋
旆以歸河中因密召上將數人語其事時親從指揮使
高季昌獨挺出抗言曰天下雄傑窺此舉者一歲矣今
岐人已困願少俟之帝嘉其言因曰兵法以正理以奇
勝奇者詐也乘機集事必由是乎乃命季昌密募人入
岐以紿之尋有騎士馬景堅願應命且曰是行也必無

生理願戮其孥帝悽然止其行景固請乃許之明日軍出諸寨屏匿如無人景因躍馬西走直叩岐圍詐以軍怨東遁為告且言列寨尚留萬餘人俟夕將遁矣宜速掩之李茂貞信其言遽啓二扉悉衆來寇時諸軍已介馬待之中軍一鼓百營俱進又分遣數騎以據其圍岐人進不能駐其趾退不能入其壘殺戮蹂踐不知其數茂貞繇是喪膽但閉壁而已十一月癸卯廊帥李周彝統兵萬餘人屯于岐之北原與城中舉烽以相應翼日

帝以周彝既離本部鄜時必無守備因命孔勅乘虛襲下之甲寅鄜州平周彝聞之收軍而遁茂貞既失鄜州之援愕然有瓦解之懼繇是議還警蹕誅闍寺以自贖焉三年正月甲寅岐人啓壁昭宗降使宣問慰勞兼傳密旨尋又命翰林學士韓渥趙國夫人龐顏齋詔押賜帝紫金酒器御衣玉帶丙辰華州留後李存審遣飛騎來告青州節度使王師範遣牙將張厚輦甲冑弓槊詐言來獻欲盜據州城事覺已擒之矣是日師範又遣其

將劉鄩盜據兗州丁巳昭宗遣中使押送軍容使韓全
誨已下三十餘人首級以示帝甲子昭宗發離鳳翔幸
左劔寨權駐蹕帝營帝素服待罪昭宗命學士傳宣免
之帝即入見稱罪拜伏者數四既而促召升殿密通御
座且曰宗廟社稷是卿再造朕與親屬是卿再生因解
所御玉帶面以賜帝亦以玉鞍勒馬金器紋錦御饌酒
果等躬自拜進馬及翠華東行帝匹馬前導十餘里宣
令止之己巳昭宗至長安謁太廟御長樂樓禮畢謂帝

曰朕生入舊京是卿之力也自古救君之危曾無有如
是者況今日再及清廟得親奉觴酒奠於先皇帝室前
卿之德朕知不能報矣即召帝執手聲淚俱發者久之
翼日誅宦官第五可範等五百餘人于內侍省三月庚
辰制以帝為守太尉兼中書令宣武宣義天平護國等
軍節度使諸道兵馬副元帥加食邑三千戶實封四百
戶仍賜回天再造竭忠守正功臣戊戌帝建旆東還昭
宗御延熹樓送之既醉遣內臣賜帝御製楊柳詞五首

三月戊午至大梁時以青州未平命軍士休澣以俟東
征四月丙子帝巡師於臨朐亟命逼其城與青州戰于
城下大敗之是夕淮將王景仁以所部援軍宵遁帝遣
楊師厚追及輔唐殺千人乘勝攻下密州八月戊辰以
伐叛之柄委于楊師厚帝乃東還九月癸卯師厚率大
軍與王師範戰于臨朐青軍大敗殺萬餘人并擒師範
弟既克卯時徙寨以逼其城辛亥偏將劉重霸擒棗州
刺史邵播來獻播師範之謀主也帝命斃之戊午師範

舉城請降青州平翼日分命將校畧地於登萊淄棣等
州皆下之繇是東漸至海皆為梁土也帝復命師範權
知青州軍事師範乃請以錢二十萬貫犒軍帝許之
十月辛巳護駕都指揮使朱友倫因擊鞠墮馬卒于長
安節至帝大怒以為唐室大臣欲謀叛已致友倫暴死
十一月丁酉青將劉鄩舉兗州來降鄩王師範之將也
師範令竊據兗州久之及聞師範降鄩乃歸命帝以鄩
善事其主待之甚優尋署為元帥府都押牙權知鄆州

留後天祐元年正月己酉帝發自大梁西赴河中京師聞之為之震懼是時將議迎駕東幸洛陽慮唐室大臣異議帝乃密令護駕都指揮使朱友諒矯昭宗命收宰相崔裔京兆尹鄭元規等殺之時又邠岐兵士侵逼京畿帝因是上表堅請昭宗幸洛昭宗不得已而從之帝乃率諸道丁匠財力同構洛陽宮不數月而成二月乙亥昭宗駐蹕於陝帝自河中來覲謁見行營因灑涕而言曰李茂貞等竊謀禍亂將迫乘輿老臣無狀請陛下

東遷為社稷大計也昭宗延命於寢室見何皇后面賜
酒器及衣物何后謂帝曰此後大家大婦委身於全忠
矣因歔歔泣下後數日帝開宴於陝之私第請駕臨幸
翼日帝辭歸洛陽昭宗開內宴時有宮人與昭宗附耳
而語韓建躡帝之足帝遽出以為圖已因連上章請車
駕幸洛三月丁未昭宗制以帝兼判左右神策及六軍
諸衛事是時昭宗累遣中使及內夫人傳宣謂帝曰皇
后方在草蓐未任就路欲以十月幸洛帝以陝州小藩

非萬乘久留之地時以四月內東幸閏月丁酉昭宗發自陝郡壬寅次于穀水是時昭宗左右唯小黃門及打毬供奉內園小兒共二百餘人帝猶忌之是日密令醫官許昭遠告變乃設饌於別幄召而盡殺之皆坑于幕下先是選二百餘人形貌大小一如內園人物之狀至是使一人擒二人縊於坑所即蒙其衣及戎具自飾昭宗初不能辨久而方察自是昭宗左右前後皆梁人矣甲辰車駕至洛都帝與宰相百官導駕入宮乙卯昭宗

以帝為宣武宣義護國忠武四鎮節度使時帝請以鄆州授張全義故有此命五月丙寅昭宗宴羣臣曰昨來御樓前一夜亡失赦書賴梁王收得副本不然誤事宰執不得無過矣是日宴次昭宗入內召帝於內殿曲宴帝不測其事不敢奉詔又曰卿不欲來即令敬翔入來帝密遣翔出乃止己巳奉辭東歸乙亥至大梁六月帝遣都將朱友裕率師討邠州節度使楊崇本叛故也癸丑帝西征遂朝於洛陽七月甲子昭宗宴帝於文思殿

塲乙丑帝發東都壬申至河中八月壬寅昭宗遇弒於
大內遺制以輝王祝為嗣乙巳帝自河中引軍而西癸
丑次於永壽邠軍不出九月辛未班師十月癸巳至洛
陽詣西內臨於梓宮前畢祇見于嗣君辛丑制以帝至
自西征十一月辛酉光州遣使來求援時光州歸款於
帝尋為淮人所攻故來乞師戊寅帝南征度淮次于霍
丘大掠盧壽之境淮人乃棄光州而去二年正月庚申
進攻壽州壽人堅壁不出丁亥帝自霍丘班師二月辛

卯帝至自南征甲午青州節度使王師範至大梁帝待
以賓禮尋表授河陽節度七月辛酉天子賜帝迎鑾紀
功碑樹于洛陽庚午遣大將軍楊師厚率前軍討趙匡凝
于襄州辛未帝南征表匡凝罪狀請削奪官爵八月楊
師厚進收唐鄧復郢隨均房等七州帝駐軍漢江北自
循江干徑度濟師之所九月甲子師厚於陰谷江口造
梁以濟師匡凝率兵二萬振于江濱師厚麾兵進擊襄
人大敗殺萬餘衆乙丑匡凝焚其州率親軍載輕舸沿

漢而遁丙寅帝濟江至中流舟壞將沒者數四比及岸舟沉是日入襄城帝因周視府署其帑藏悉空惟於西廡下有一亭窻戶儼然扃鎖甚密遂令破鑿啓扉中有一大匱緘鏽甚至又令破其匱內有金銀數百錠帝因歎曰亂兵既入公私財貨固無孑遺矣此帑當有陰物主之不令常人所得俟我以有之邪遂以百餘錠賜楊師厚襲荊州留後趙匡明并城上峽奔蜀荆襄二州平帝以都將賀環權領荊州楊師厚權領襄州即表其事十

月丙戌朔天子以帝為諸道兵馬元帥辛卯帝自襄州引軍由光州路趨淮南將發敬翔切諫請班師以全軍勢帝不聽壬辰次於棗陽遇大雨頗阻師行之勢軍至壽春壽人堅壁清野以待帝帝乃退舍於正陽十一月丙辰大軍北濟帝至汝陰深悔淮南之行躁撓尤甚丁卯帝至自南征辛巳天子命帝為相國總百揆以宣武宣義天平護國天雄武順佑國河陽義武昭義保義武昭武定泰寧平盧匡國武寧忠義荆南等二十一道為魏

國進封帝為魏王入朝不趨劔履上殿讚拜不名兼備
九錫之命癸未唐中書門下奏中書印已送相國中書
公事權用中書省印甲申中書門下奏天下州縣名與
相國魏王家諱同者請易之十二月乙酉朔帝讓相國
魏王九錫之命丙戌京百司各差官齋本司須知孔目
並印赴魏國送納甲午天子以帝堅讓九錫之命乃命
宰相柳璨來使且述揖讓之意焉丁酉帝又讓九錫之
命詔畧曰但以鴻名難掩懿實須彰宜且徇於秦陳未

便行於典冊又改諸道兵馬元帥為天下兵馬元帥是時帝以唐朝百官服飾多闕乃製造逐色衣服請朝廷等第賜之其所給俸錢仍請自來年正月全支三年正月幽滄稱兵將寇于魏魏人來乞師且以牙軍驕悍謀欲誅之遣親吏臧延範密告于帝帝陰許之乙丑北征先是帝之愛女適羅氏是月卒於鄴城因以兵仗數千實於橐中遣客將馬嗣勳領長直軍千人雜以工匠丁夫肩其橐而入于魏聲言為帝女以設祭魏人信而


不疑庚午夜嗣勲率其衆與羅紹威親軍數百人同攻
牙軍遲明盡殺之死者七千餘人泊于嬰孺亦無留者
是日帝次于內黃聞之馳騎至魏時魏之大軍方與帝
軍同伐滄州聞牙軍之死即時奔還帝之軍追及厯亭
殺賊幾千餘衆乃擁大將史仁遇保于高唐帝遣兵圍
之是月天子詔河南尹張全義部署修製相國魏王法
物三月甲寅天子命帝總判鹽鐵度支部等三司事
帝再上章切讓之乃止四月癸未攻下高唐軍民無少

長皆殺之生擒逆首史仁遇以獻命支解之未幾又攻
下澶博貝衛等州皆謂魏軍殘黨所據故也是時晉人
圍邢州刺史牛存節堅壁固守帝遣符道昭帥師救之
晉人乃遁去五月帝畧地于洺州既而復入于魏七月
己未自魏班師是日收復相州自是魏境悉平壬申帝
歸自魏八月甲辰以滄州未平復命北征九月丁卯營
于長蘆一夕帝夢白龍附于兩肩左右瞻顧可畏恍然
驚悟十月辛巳邠州楊崇本以鳳翔邠寧涇廊秦隴之

衆合五六萬來寇屯于美原列十五寨其勢甚盛帝命同州節度使劉知俊都將康懷英帥師禦之知俊等大破邠寇殺二萬餘衆奪馬三千餘匹擒其列校百餘人楊崇本胡章僅以身免十一月庚戌康懷英乘勝進軍遂收鄜州十二月乙丑帝以文武常參官每月一五九日赴朝奏請備廊食詔從之閏月晉人燕人同攻潞帥丁會舉城降于太原帝聞之遂自長蘆班師以寨內糗糧山積帝命焚之滄帥劉守文以城中絕食因致書于

帝乞留餘糧以救饑民帝為留十餘困以與之四年正月丁亥帝迴自長蘆次于魏州節度使羅昭威以帝迴軍慮有不測之患由是供億甚至因密以天人之望切陳之帝雖拒而不納然心德之壬寅帝至自長蘆甲辰天子遣御史大夫薛貽矩來傳禪代之意貽矩謁帝陳北面之禮帝揖之升階貽矩曰殿下功德及人三靈所卜已定皇帝方議裁詔行舜禹之事臣安敢違既而拜伏於砌下帝側躬以避之四月內出傳國寶玉冊受禪

寶及文物儀仗朝于梁國改元開平



冊府元龜卷一百八十七

欽定四庫全書

子部

冊府元龜卷一百八十八

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官典簿臣郭祚熾

謄錄監生臣劉紳

欽定四庫全書

冊府元龜卷一百八十八

宋 王欽若等 撰

閏位部

紹位 年號

紹位

夫易著繼明之義傳有世及之文皆所以紹祖考而保成基也其或叔世艱虞庶邦離析或專制寓內或奄據一隅端委篡戎傳世承祀或正位儲副用禮而陞或入

繼大宗以恩而立或克平多難嗣守家邦或始因顧託
潛圖篡奪何嘗不蹈道者逢吉長惡者終凶斯以見天
無常親民無常心鬼神饗於有德億兆歸於至仁者矣

秦二世皇帝胡亥始皇帝之少子

王欽若等曰始皇事
迹悉具閏位勲業門

蜀吳以下
皆倣此

始皇三十七年十月行出遊會稽并海上北

抵瑯琊丞相李斯中軍府令趙高兼行符璽令事皆從
始皇有二十餘子長子扶蘇以數直諫始皇始皇使監
兵上郡蒙恬為將唯胡亥愛請從始皇許之餘子莫從

辯上隱姓名遺秦將章邛書曰李斯為秦王死廢
十七兄而立今王然則二世是始皇第十八子也其年

七月始皇帝至沙丘病甚令趙高為書賜公子扶蘇曰
以兵屬蒙恬與喪會咸陽而葬書已封未授使者書及
璽皆在趙高所獨子胡亥丞相李斯趙高及幸宦者五
六人知餘羣臣皆莫知也李斯以為始皇在外晏駕無
真太子故秘之置始皇居輜輶車中一作輜車百官奏事上
食如故宦者輒從輜輶車中可諸奏事趙高因留所賜
扶蘇璽書與丞相李斯謀詐為受始皇詔丞相立子胡

亥為太子更為書賜扶蘇死至咸陽發喪太子立為二世皇帝

子嬰二世之兄子趙高殺二世而立子嬰為秦王

蜀後主禪先主子章武元年立為太子三年四月先主殂於永安宮五月後主襲位於成都時年十七

吳廢帝會稽王亮大帝之子赤烏十三年立為太子太元元年大帝寢疾大將軍諸葛恪為太子太傅會稽太守滕胤為太常竝受詔輔太子明年四月帝薨太子即

尊號

景帝休大帝第六子太元二年封琅琊王居虎林後徙會稽太平三年九月戊午休從弟大將軍緄以兵召大臣會宮門黜亮為會稽王使宗正孫楷與中書郎董朝迎休十月戊寅及布寨亭武衛將軍孫恩行丞相率百僚以乘輿法駕迎於永昌亭築宮以武帳為便殿止住使孫楷先見恩楷還休乘輦進羣臣再拜稱臣休升殿謙不即御坐止東廂戶曹尚書前即階下讚丞相奉

爾符休三讓羣臣三請休曰將相諸侯咸推寡人寡人
敢不承受爾符羣臣以次奉引休就乘輿百官陪位絀
以兵千人迎於半野拜於道側休下車答拜即日御正
殿

後主皓大帝孫廢太子和之子初封烏程侯就國永安
七年七月景帝休殂是時蜀初亡而交趾攜叛國內震
懼貪得長君左典軍萬彘昔為烏程令與皓相善稱皓
才識明斷是長沙桓王之疇也又加之好學奉遵法度

屢言之于丞相濮陽興左將軍張布說休妃太后朱氏
欲以皓為嗣朱曰我寡婦人安知社稷之慮苟吳國無
隕宗廟有賴可矣於是遂迎立皓時年二十三

宋少帝義符武帝長子永初元年武帝受禪立為皇太
子三年五月癸亥武帝晏駕是日太子即皇帝位

文帝義隆武帝第三子永初元年封宜都王景平二年五月
江州刺史檀道濟揚州刺史王弘入朝乙酉宣太后令
廢少帝為滎陽王立義隆令曰宜都王仁明孝弟著自

幼辰德業沖粹識心明允宜纂洪統光臨億兆王者詳
依典故以時奉迎未亡人嬰此百罹雖存若殞永悼情
事撫心摧塞是日檀道濟入守朝堂六月傅亮率行臺
迎義隆於江陵八月丁酉於中堂即皇帝位以徐羨之
為司徒傅亮為尚書令時有司奏車駕依舊臨華林園
聽訟詔曰政刑多所未悉可先二公推訊元嘉二年羨
之與亮上表歸政曰臣聞元首司契運樞成務臣道代
終事盡宣翼冕旒之道理絕於上皇拱已之事不行於

中古故高宗不言以三齡為斷冢宰聽政以再期為節
百王以降罔或不然陛下聖德紹興負荷洪業億兆顯
顯思陶盛化而聖旨謙挹委成羣司自大禮告終鑽燧
三改大明佇照遠邇傾屬臣等雖率誠屢聞未能仰感
敢藉品物之情謹因蒼生之志伏願陛下遠存周文日
昃之道近思皇室締構之艱時覽萬機躬親朝政廣闢
四聰博詢庶業則雍熙可臻有生幸甚帝未許羨之等
重曰近陳寫下情言為心罄奉被還詔覽許未迴豈惟

愚臣秉心有在詢之朝野人無異議何者形風四方實繫主德一國之事本之一人雖世代不同時殊風異至於主運臣贊古今一揆未有渾心委任而休明可期此之非宜布自遐邇臣等荷遇二世休戚以均情為國至豈容順默重披丹心冒昧以請帝猶辭羨之等又固諫曰此表披陳辭誠俱盡詔旨冲遠未垂聽納三復屏營伏增憂歎臣聞克隆先構幹蠱之盛業昧且不顯帝王之高義自皇宋創運英聖有造殷憂未闕艱患仍纏賴

天命有底聖明承業時屯國故猶在民心泰山之安未
易可保昏明隆替繫在聖躬斯誠周詩夙興之辰殷王
待旦之日豈得無為拱已復玄古之風逡巡虛挹詢匹
夫之事伏願以宗廟為重百姓為心弘大業以嗣先軌
隆聖道以增前烈愚瞽所獻情盡於此乃許之

孝武皇帝駿文帝第三子元嘉十二年封武陵王累遷
都督江州荊州之江夏豫州之西陽晉熙新蔡四郡諸
軍事三十年元凶劭弒逆帝率衆入討荊州刺史南譙

王義宣雍州刺史臧質並舉義兵四月丙寅次江寧丁
卯大將軍江夏王義恭來奔奉表上尊號戊辰至于新
亭己巳即皇帝位改新亭為中興亭五月甲戌輔國將軍
申坦克京城乙亥輔國將軍朱脩之克東府丙申克定
京邑劭及始興王濬諸同逆竝伏誅

前廢帝子業武帝長子孝建元年立為皇太子八年閏
五月庚午即皇帝位年十三以太宰江夏王義恭錄尚
書事

明帝或文帝第十一子元嘉二十五年封淮陽王二十
九年改封湘東王永光元年出為豫州刺史都督南豫
豫司江四州揚州之宣城諸軍事景和末入朝被留時
廢帝疑畏諸父將加禍害帝與腹心阮佃夫李道兒等
密謀弑廢帝於後堂升西堂登御座召見諸大臣雖未
即位凡衆事悉稱令書施行十二月丙寅即皇帝位
後廢帝昱明帝長子泰始二年立為皇太子泰豫元年
四月庚子即皇帝位

順帝準明帝第三子泰始七年封安成王為撫軍將軍
前廢帝即位初為揚州刺史元徽二年加車騎將軍都
督揚南豫二州諸軍事四年進號驃騎大將軍開府儀
同三司班劔三十五人是年七月戊子夜後廢帝殂奉
迎入居朝堂壬辰即皇帝位

南齊武帝躋太祖長子建元元年立為皇太子四年三
月壬戌即皇帝位

鬱林王昭業武帝子文惠太子長懋之長子也永明十

一年正月長懋薨四月立為皇太孫居東宮七月戊寅
即皇帝位

海陵王昭文鬱林王弟也永明四年封臨汝公十一年
封新安王隆昌元年七月丁酉明帝為大將軍廢鬱林
王立昭文為帝宣皇太后令曰新安王體自文皇叡哲
天秀宜入嗣鴻業永寧四海即以禮奉迎是日即皇帝
位以明帝為大將軍錄尚書事

明帝鸞太祖兄始安王道生之子永明十一年七月武

帝遺詔為侍中尚書令隆昌元年加鎮軍大將軍太傅宣城王是年七月廢鬱林王立海陵王十月又廢之宣皇太后令曰太傅宣城王遺體宣皇鍾慈太祖識冠生民功高造物符表夙著謳頌有在宜人承寶命式寧宗祏癸亥即皇帝位

東昏侯寶卷明帝第二子建武元年立為皇太子永泰元年七月乙酉即位

和帝寶融明帝第八子建武元年封隋郡王永元元年

改封南康王持節督荆雍益寧梁南北秦七州軍事西
中即將荊州刺史二年十一月甲寅長史蕭穎胄殺輔
國將軍巴西梓潼二郡太守劉山陽奉雍州刺史蕭衍
舉義兵以衍為持節都督前鋒諸軍事左將軍穎胄為
右將軍都督行臺諸軍事十二月壬辰驍騎將軍夏侯
亶自京師至江陵稱宣德太后令曰西中郎將南康王
宜纂承皇祚光臨億兆方俟清宮未即大號可且封宣
城南瑯琊南東海東陽臨安新安尋陽南郡竟陵宜都

十郡為宣城王相國荊州牧加黃鉞置僚屬選百官西
中郎將南康國並如故須軍次近路主者詳依舊典法
駕奉迎三年正月建牙于城南二月羣僚上尊號立宗
廟及南北郊三月乙巳即皇帝位十二月丙寅雍州刺
史王國珍侍中張楞廢東昏侯建康城平封東昏侯為
涪陵王

梁簡文帝綱高祖第三子昭明太子統母弟天監五年
封晉安王大通三年立為皇太子太清三年五月辛巳

即皇帝位

元帝繹高祖第七子天監十三年封湘東王太清元年
為荊州刺史都督荆雍九州諸軍事三年三月侯景寇
建業高祖密詔帝為侍中假黃鉞都督中外諸軍事司
徒承制徵兵討景是年簡文帝為景立明年改元太寶
又明年逼禪於豫章王棟改元天正而帝在江陵只稱
太清五年又明年三月王僧辨等平侯景傳其首至江
陵十一月丙子即帝位

敬帝方智元帝第九子承聖二年以晉安王出為江州
刺史三年十一月江陵為西魏所陷太尉揚州刺史王
僧辨司空南徐州刺史陳霸先等定議以帝為太宰承
制奉迎還京師四年二月入居朝堂三月北齊遣其上
黨王高渙送貞陽侯蕭淵明來王梁嗣至東關吳興太
守裴之橫與戰敗績僧辨率衆出屯姑熟七月辛丑僧
辨納淵明自采石濟江甲辰入於京師以帝為皇太子
九月甲辰霸先舉義襲殺僧辨黜淵明丙午即皇帝位

陳高祖紀云初北齊之請納貞陽也高祖以為不可遣使詣僧辨苦爭之反復數四僧辨竟不從高祖居嘗憤歎密謂所親曰武皇雖盤石之宗遠布四海至於克雪讎恥寧濟艱難惟孝元而已功業之盛前代未聞我與王公俱受重寄語未絕音聲猶在耳豈期一旦乃有異圖嗣主高祖之孫元皇之子海內屬目天下宅心竟有何辜坐致廢黜遠求夷狄假立非次觀其此情亦可知矣乃密賜其袍數千領及錦綵金銀以為賞賜之具九月壬寅高祖詔徐度侯安都周文育等謀之仍部署將士分賞金銀綵帛水陸俱進是夜發南徐州討王僧辨甲辰高祖步軍至石頭前遣勇士自城北踰入時僧辨方視事外白有兵俄而兵自內出僧辨遽走與其第三子鎮相遇俱出閣右尚數十人苦戰高祖大兵尋至僧辨衆寡不敵走登城南門樓高祖因風縱火僧辨窮迫乃就擒是夜縊僧辨及鎮丙午貞陽遜位百寮奉晉安王上表勸進十月己酉晉安即位

後梁宣帝詒昭明太子統第三子中大通三年封岳陽郡王大同元年出為雍州刺史太清三年高祖以詒兄江東王譽為湘州刺史徙湘州刺史張讚為雍州以代詒屬侯景寇建業詒不受代西魏恭帝元年後周太祖輔政令柱國于謹平江陵立詒為梁主居江陵東城資以江陵一州之地其襄陽所統東歸于魏詒稱皇帝於其國

孝明帝歸宣帝太子詒殂太子嗣位

後王琮明帝歸之子初封東陽王尋立為太子歸殂太子嗣位後歸於隋

陳世祖文帝舊高祖兄始興昭烈王之長子永定初封臨川郡王三年率兵城南皖是年六月丙午高祖遣詔徵入纂位甲寅至自南皖入居中書省皇后令曰昊天不弔上玄降禍大行皇帝奄捐萬國率土哀號普天如喪窮酷煩冤無所迨及諸孤藐爾反國無期須立長主以寧寓縣侍中安東將軍臨川王舊體自景皇屬惟猶

子建殊功於牧野敷盛業於戲黎納麓時敘之辰負扆
乘機之日竝佐時雍是同草創祧祐所繫遐邇宅心宜
奉天宗嗣膺寶錄使七廟有奉兆民寧晏未亡人假延
餘息嬰此百懼尋經纏綿興言感絕帝固讓至于再三
羣公卿士固請其日即皇帝位於太極前殿

廢帝伯宗文帝嫡長子永定二年立為臨川王世子文
帝嗣位立為皇太子天康元年四月癸酉即皇帝位於
太極前殿詔曰上天降禍大行皇帝奄捐萬國攀號靡

及五內摧殞朕以涼德嗣膺寶命熒熒在疚懼其綴旒
方賴宰輔救其不逮其令內外文武各復其職遠方悉
停奔赴

高宗皇帝頊始興昭烈王第二子文帝嗣位封安城王
廢帝光大二年累加太傅領司徒十一月甲寅慈訓太
后令降廢帝為臨海郡王以帝入纂令曰太傅安成王
固天生德齊聖廣淵二后鍾心三靈佇眷自前朝不念
任總邦家威惠相宣刑禮兼設指揮嘯叱湘郢廓清闕

地開疆荆益風靡若太戊之承殷歷中宗之奉漢嗣較

以功名曾何髣髴且地彰玉璽天表長彗

王欽若等曰是歲五月帝

為太傅獻玉璽六月彗星見

布新除舊禎祥咸顯文皇知子之監事

甚帝堯傳弟之懷又符大伯今可還申曩志崇立賢君

方固宗祧載貞辰象中外宜依舊典奉迎輿駕未亡人

不幸屬此殷憂不有崇替容危社稷何以拜祠高寢歸

附武園攬筆潛然兼懷悲慶三年正月甲午即皇帝位

於太極前殿

後主叔寶宣帝嫡長子天嘉三年封成安王大建元年
立為皇太子十四年正月丁巳即皇帝位于太極前殿
東魏孝靜帝清河王亶世子永熙三年八月孝武帝既
入關十月大將軍高歡乃與百寮會議推帝以奉明帝
之後即皇帝位于雒城是月東北遷于鄴

北齊廢帝殷文宣帝長子天保元年立為皇太子十年
十月癸卯即帝位於晉陽宣德殿

孝昭帝演字延安文宣母弟也天保元年封常山王十

年十一月廢帝嗣位乃即朝班除太傅錄尚書事朝政皆決於帝月餘乃居藩邸自是詔勅多不關帝客或言於帝曰鷲鳥捨巢必有探卵之患今日之地何宜屢出乾明元年從廢帝赴鄴居于領軍府時楊愔燕子獻爾朱渾天和宋欽道鄭子默等以帝望既重內懼權逼請以帝為太師司州牧錄尚書事長廣王湛為大司馬錄并省尚書事解京畿大都督帝以尊親而見猜斥乃與長廣王期獵謀之于野三月甲戌帝初上省旦發領軍府

大風暴起壞所御車幔帝甚惡之及至省朝士咸集坐
定酒數行于坐執尚書令楊愔右僕射燕子獻領軍爾
朱渾天和侍中宋欽道等於座帝戎服與平原王段韶
平秦王高歸彥領軍劉洪徽入自雲龍門於中書省前
遇散騎常侍鄭子默又執之同斬于御府之內帝至東
閣門都督成休寧抽刃呵帝帝令高歸彥喻之休寧厲
聲大呼不從歸彥既為領軍素為兵士所服悉皆弛仗
休寧方歎息而罷帝入至昭陽殿幼主太皇太后皇太

后並出臨御坐帝奏愆等罪求伏專擅之罪時庭中及兩廊下衛內二千餘人皆披甲待詔武衛娥永樂武力絕倫被文宣重遇撫刃思効廢帝性吃訥兼倉卒不知所言太皇太后又為皇太后誓言帝無異志唯去逼而已高歸彥宣勅勞衛士解嚴永樂乃內刃而泣帝乃令歸彥引侍衛之士向華林園以京畿軍入守門閣斬娥永樂于園詔以帝為大丞相都督中外諸軍錄尚書事帝尋入晉陽有詔軍國大政咸諮決焉帝既當大位知

無不為乾明元年八月壬午宣太后令降廢帝為濟南王是日即位於晉陽宣德殿

武成帝湛孝昭帝母弟天保元年封長廣王皇建元年為右丞相孝昭幸晉陽留帝守鄴二年十一月甲辰孝昭詔曰朕嬰此暴疾奄忽無逮今嗣子冲眇未聞政術社稷業重理歸上德右丞相長廣王研幾測化體道居宗人雄之望海內瞻仰同胞共氣家國所馮可遣尚書左僕射趙郡王叡喻旨徵王統茲大寶手書云宜將吾

妻子置一好處勿學前人也帝乃自鄴至晉陽宮發喪於崇德殿皇太后令所司宣遺詔左丞相斛律金率百僚敦勸三奏乃許之癸丑即皇帝位於南宮

後主緯武成帝長子大寧二年立為皇太子河清四年四月太史奏天文有變其占當有易主丙子乃使太宰

段韶兼太尉持節奉皇帝璽綬傳位於皇太子於是羣

公上尊號為太上皇帝軍國大事咸以奏聞

初將傳政使內參乘

子尚乘驛送詔書于鄴子尚出晉陽城見子騎隨後忽失之子尚未至鄴而其言已布矣

梁末帝瑱太祖第三子開平元年封均王四年出為東京馬步軍都指揮使乾化二年六月三日庶人友珪為逆遂即偽位明年改元鳳歷是年二月侍衛親軍使袁象先引禁兵誅友珪遣趙巖賈傳國寶至東京請帝即位於雒陽帝報之曰夷門太祖創業之地公等如堅推戴冊禮宜在東京賊平之日即謁雒陽陵廟是月帝即位於東京乃去鳳歷之號復稱乾化三年

年號

自漢武紀元立號而後代因之逮於鼎國以至江左亦皆建正朔備制度或標瑞應之日或取休美之稱或宣紀德化或章明功烈紀年頒歷於是乎在今考於舊史洎東魏北齊以及朱梁條次比敘咸可見矣

蜀先主以後漢建安二十六年四月即皇帝位於成都

是歲魏黃初三年大赦改元章武

盡三年四月

後主以章武三年四月即位改元建興

盡十五年

延熙元年正月大赦改元

盡二十年

景耀元年史官言景星見於是大赦改元

盡六年夏

炎興元年夏大赦改元

其年降於晉王欽若等曰自此以下不書月者皆史闕文

吳大帝初為吳王以魏黃初三年九月改元黃武

盡七年三

月

黃龍元年四月夏口武昌並言黃龍鳳凰見丙申南郊

即皇帝位大赦改元

盡三年

嘉禾元年

黃龍三年十月會稽南始平言嘉禾生十二月丁卯大赦改元盡七年七月

赤烏元年八月武昌言麒麟見有司奏言麒麟者太平

之應宜改年號詔曰間者赤烏集於前殿朕親見若神靈以為嘉祥者改年宜以赤烏為元羣臣奏曰昔武王伐紂有赤烏之祥君臣觀之遂有天下聖人書策載述最祥者以為近事既嘉親見文明也於是改元盡十四年四月

太元元年五月立皇后潘氏大赦改元盡明年正月

神鳳元年二月大赦改元盡其年三月

廢帝亮以神鳳元年四月即位大赦改元建興盡二年

五鳳元年建興二年十一月有大烏五見于春申明年改元盡三年十月

太平元年十一月己酉大赦改元

盡三年九月

景帝以太平三年九月即位大赦改元永安

盡七年七月

後主以永安七年七月即位大赦改元元興

盡其年

甘露元年四月蔣陵言甘露降於是大赦改元

盡二年七月

寶鼎元年八月所在言得大鼎於是大赦改元

盡四年九月

建衡元年八月大赦改元

盡三年

鳳凰元年

建衡三年西苑言鳳凰集改元盡三年

天册元年吳郡言掘地得銀長一尺廣三分刻上有年

月字於是大赦改元

盡其年

天璽元年吳郡言臨平湖自漢末草穢壅塞今更開通
長老相傳此湖塞天下亂此湖開天下平又於湖邊得
石函中有小石青白色長四寸廣二寸餘刻上作皇帝

字於是大赦改元

盡其年

天紀元年鄱陽言歷陽山石文理成字又吳興陽羨山
有空石長十餘丈名曰石室所在表為大瑞乃遣兼司
徒董朝兼太常周處至陽羨縣封禪國山改元大赦以

協石文

盡四年三月降于晉

宋高祖以晉元熙二年六月受禪改元永初

盡三年

少帝以永初三年五月即位明年正月己亥朔大赦改

元景平

盡二年七月

文帝以景平二年七月自宜都王即位大赦改元元嘉

盡三年

十年

孝武帝以元嘉三十年四月即位明年正月親祠南郊

大赦改元孝建

盡三年

大明元年正月辛亥朔大赦改元盡八年

前廢帝以大明八年閏五月即位明年正月乙未朔大

赦天下改元永光盡其年八月

景和元年八月誅太宰江夏王義恭等改元盡其年

明帝以景和元年十二月丙寅自湘東王即位大赦改

元泰始盡七年

泰豫元年正月甲寅朔帝有疾不朝會以疾患未痊故

改元泰豫盡其年

後廢帝以泰豫元年四月即位明年正月戊寅朔大赦

改元元徽

盡五年七月

順帝以元徽五年七月即位大赦改元昇明

盡三年三月

南齊太祖以宋昇明三年四月受禪大赦改元建元

盡四年

年二月

世祖武皇帝以建元四年三月即位改元永明

盡十一年

鬱林王以永明十一年七月即位明年正月丁未大赦

改元隆昌

盡其年七月

海陵王以隆昌元年七月即位改元延興

盡其年十月

明帝以延興元年十月即位大赦改元建武

盡四年

永泰元年四月甲寅赦三署囚改元

盡其年

東昏侯以永泰元年七月即位明年正月大赦改元永

元

盡二年三月

和帝以永元三年三月即位于江陵大赦改元中興

盡二年

年四月

梁高祖天監元年以齊中興二年四月受禪改元天監

盡十
八年

普通元年正月乙亥大赦改元盡七
年

大通元年三月大赦改元盡二
年

中大通元年十月己酉大赦改元盡六
年

大同元年正月戊申朔大赦改元盡十
一年

中大同元年四月大赦改元盡其
年

太清元年四月丁亥大赦改元盡三
年

簡文帝以太清三年五月即位明年正月辛亥朔大赦

改元大寶

盡二年七月侯景逼禪于豫章王改元天正

元帝以太清六年十一月即位改元詔曰昔虞夏商周年無嘉號漢魏晉宋因循以久朕雖云撥亂自非創業思得上繫宗祧下惠億兆可改太清六年為承聖元年

盡三年

年

敬宗紹泰元年以承聖三年十一月元帝都江陵陷于長安陳霸先等定議以帝為皇太子明年九月霸先襲殺王僧辨黜蕭淵明十月帝即皇帝位大赦改元

盡二年八月

月

太平元年九月壬寅改元

盡二年十月禪于陳

後梁宣帝以後魏恭帝元后為后周太祖所立居江陵

東城稱皇帝於其國年號大定

盡八年

明帝以大定八年嗣位改元天保

盡二十三年

後主以太子嗣位改元廣運

盡二年歸于隋

陳高祖以梁太平二年十月受禪大赦改元永定

盡三年

文帝以永定三年六月即位明年正月癸丑大赦改元

天嘉 盡六年

天康元年三月大赦改元 盡其年

廢帝以天康元年四月癸酉自太子即位明年正月大

赦改元光大 盡二年

宣帝以光大二年十一月自太傅入纂位明年正月甲

午即位改元大建 盡十四年

後主以大建十四年正月即位明年正月壬寅大赦改

元至德 盡四年

禎明元年正月戊寅大赦改元

盡三年正月
為隋所滅

東魏孝靜帝以後魏永熙三年十月為高歡所立即皇

帝位於鄴城東北大赦改元天平

盡四年

元象元年正月有巨象自至碭郡陂中南兗州獲送于

鄴大赦改元

盡其年

興和元年十月癸亥以鄴都新宮成大赦改元

盡四年

武定元年正月壬戌朔大赦改元

盡八年五月
禪于北齊

北齊文宣以東魏武定八年五月受禪南郊禪畢大赦

改元天保

盡十年初帝改年識者曰天保之字一大人共十帝其不過十年乎

廢帝以天保十年十月即位明年正月癸丑朔大赦改

元乾明

盡其年八月

孝昭帝以乾明元年八月即位於晉陽宣德殿大赦改

元皇建

盡二年十月

武成帝以皇建二年十一月癸丑即位于南宮大赦改

元大寧

盡二年三月

河清元年四月以河濟清改元

盡四年三月

後主以河清四年四月即位大赦改元天統盡五年

武平元年正月乙酉朔大赦改元盡七年十月

隆化元年十二月丁巳大赦改元盡其年

少帝以隆化二年正月乙亥即位大赦改元

承光元年在位十八日以後俱奏青州為後周所滅

梁太祖以唐天祐四年四月受禪改元開平盡五年四月

乾化元年五月甲申朔御朝元殿大赦改元盡六年六月

末帝以乾化三年二月即位於大梁五年十一月改元

貞明

畫七年四月先是乾化二年六月庶人友珪弒逆明年正月改元鳳歷是年二月誅友珪帝復稱乾

化至是改焉

龍德元年五月丙戌朔改元

畫三年十月為後唐所滅

冊府元龜卷一百八十八